

SANCTI ANSELMI HYMNI ET
PSALTERIUM DE SANCTA VIRGINE
MARIA.

303 *Hymnus ad nocturnum.*

Lux quae luces in tenebris,
Ex alvo nata Virginis,
Nostram nocte nos exue,
Diemque tuum indue.

MARIA Dei thalamus,
Posce te venerantibus,
Virtutibus ut splendeant,
Quos reatus obtenebrant.

Gloria tibi Domine,
Nato de sancta Virgine,
Regnanti victo funere,
Cum Patre et sancto Spiritu.

Amen.

Ad laudes

Praefulgens sol justitiae,
Ortus de sacra Virgine,
Splendore tuo noxias
Nostras illustra tenebras.

Orientis castissima
Mater fac nobis, Domina,
Vita prorsus ut decadat
Vetus, nova proficiat.

Gloria tibi Domine, etc.

Ad primam.

O Christe proles Virginis,
Patris compar altissimi,
Per tuae matris merita,
Dele nostra peccamina,
O mundo venerabilis,
Virgo mater mirabilis,
Maria plena gratia,
Ora pro nobis domina.
Gloria tibi Domine, etc.

Ad tertiam

Quem credimus ex Virgine
Natum, benigne Domine;
Sit nobis haec confessio,
Peccatorum remissio.
Quae genuisti filium
A summo Patre genitum,
Per haec tua nos merita,
A lapsu mortis libera.
Gloria tibi Domine, etc.

Ad sextam.

Nate summe rex utero
Mariae de Virgineo,

Emunda nos a vitiis,
Et orna sanctis meritis.

Dei mater, o domina,
Sublimis tanta gratia;
Tua, fac, exaltatio.
Sit nostra relevatio.
Gloria tibi, etc.

Ad nonam.

Fili Mariae virginis,
Da nobis ejus meritis
A peccatis resurgere,
Et ad vitam pertingere.

Cujus es factus filius,
Deus, pro peccatoribus,
Hoc qui fide pronuntiant,
Fac ut salutem sentiant.
Gloria tibi, etc.

Ad vesperas.

Sol casto nascens utero,
Vesperascente saeculo,
Illustra nos perpetue,
Nec declines in vespere.

Aeterni solis genitrix,
Tuis hoc sanctis meritis
Age quo perpes maneat
Nobis, nec unquam decadat.

Gloria tibi, etc.

Ad completorium.

De casta nobis oriens
Matre dies indesinens,
Jugi nos fove lumine,
Culpaque noctem remove.

Mater diei perpetis,
Obsiste nostris tenebris,
Ne lucem nobis dissipent,
Et nos delictis implicent.

Gloria tibi, etc.

*Salutatio deprecatoria, ante Psalterium beatae
Virginis dicenda.*

Salve Regina mater misericordiae, vita, dulcedo, et spes
nostra salve. Ad te clamamus exsules filii Evae: ad te
suspiramus gementes, et flentes in hac lacrymarum valle. Eia
ergo advocata nostra, illos tuos misericordes oculos ad nos
converte, et Jesum benedictum fructum ventris tui nobis post
hoc exsilium ostende: O clemens! o pia! o dulcis gloriosa
Domina nostra, pro nobis intercede.

PSALTERIUM DOMINAE NOSTRAE

(PARS I).

Ave mater advocati,
Qui beatus consilio,
Aula ventris incorrupti
Processit ut ex thalamo.

Beatus vir qui non abiit, etc.

Ave mater, cujus partus
Postulavit Deum Patrem,
Et accepit, quas redemit,
Gentes in haereditatem.

Postula, etc.

Ave mater, cujus partus
Obdormiens patiando,
In sepulcro soporatus,
Mortem vicit resurgendo.
Gloria tibi, etc.

Ego dormivi, etc.

Ave mater, cujus partus
Nobis dedit in sanguine,

Ut signetur baptizatus
Divinitatis lumine.
Gloria tibi, etc.

Signatum est, etc.

Ave mater, cujus nos filius
Scuto bonae voluntatis
Induit propitius,
Lux immensae majestatis.

Scuto bonae, etc.

Ave thronus Deitatis,
In quo Deus majestatis
Dignatur homo fieri.
Unde nostras animas
Eripuit in gratia;
Et quas effecit liberas,
Salvas fecit in gloria.

Convertere, etc.

Ave mater, cujus partus

Sua facit justitia
Ut in nobis Patris ejus
Sint justa adjutoria.

Justum adjutorium meum a Domino.

Ave nostra advocatrix,
Atque vitae reparatrix:
Cujus partus super ipsos
Dominus est coeli thronos.

Quoniam elevata est, etc.

Ave Sion, in qua Deus
Habitavit homo factus:
In quo sperant enixius
Qui noverunt nomen ejus.

Et sperent in te, etc.

Ave Virgo singularis,
Placens aula virginalis,
Cujus in templo Dominus
Et in coelo sedes ejus.

304 *Dominus in templo, etc.*

Ave, cujus in filio
Salutem Pater posuit,
In quo sicut in unico
Fidem nostram constituit.

Ponam in salutari, etc.

Ave, de cujus filia
Salutari Dei Patris,
Exsultamus in Domino,
Qui bona tribuit nobis.

Exsultavit cor meum, etc.

Ave nostra advocatrix,
Captivorum liberatrix,
De qua Sion Emmanuel
Salutare fit Israel.

Quis dabit, etc

Ave, cujus mons filius.
Dei Patris est unicus,
In quo sancti requiescunt,
Qui veritatem diligunt.

Domine, quis habitabit, etc.

Ave regina virginum,
Mater Virgo post filium,
Cujus partus haereditas
In laetis est praeclara.

Funes ceciderunt, etc.

Ave mater, quem praedicat
In te nostra mortalitas,
Quia tuus mirificat
Partus misericordias.

Mirificat misericordias, etc.

Ave, quam laudant spiritus,
Cui virtus omnis concinit,

De cujus coelo Dominus
Nube carnis intonuit.

Et intonuit, etc.

Ave, cujus virgineo
Deus processit thalamo,
Dotali nobis gratia
Se praebens in sponsalia.

In sole, etc.

Ave Sion, de qua Deus
Nos tuetur incarnatus,
Memor nostri libaminis
In pace sui corporis.

Memor sit, etc.

Ave mater, cujus partum
Coelestis Pater unicum
In saeculum dat gentibus
In benedictionibus,

Quoniam dabit, etc.

Ave mater, cujus partum
Panem vitae nobis factum,
Pingues terrae ex quo vivant
Et manducant et adorant.

Manducaverunt, etc.

Ave nostra advocatrix,
Cujus partus mensa Patris
Est nobis consolatio,
Ne frangat tribulatio.

Parasti in conspectu, etc.

Ave Regina gratiae,
Cujus partus Rex gloriae
Rex est virtutum Dominus,
Lux de luce Christus Deus.

Quis est iste, etc.

Ave, cujus virgineo
Processit ex sacrario,
Una salus omni mundo,
Dulcis Deus, rectus homo.

Dulcis et rectus, etc.

Ave nostra advocatrix,
Et lapsorum reparatrix,
De qua Deus factus homo.
Solus stetit in directo.

Puer meus, etc.

Ave mater cujus sponsus
Et creator et filius,
Deus illuminatio,
Salus est et protectio.

Idem.

Ave mater redemptoris,
Caro cujus effloruit,

Quando passus gustum mortis
De sepulcro resurrexit.

Et re floruit, etc.

Ave mater castitatis
De qua Deus majestatis
Scripturarum voces pluit,
Et virtutes intonuit.

Vox Dei super aquas, etc.

Ave mater, cujus partus
Resurgendo nobis factus
Matutina laetitia,
Nostra spes est, et gloria.

Ad vesperum, etc.

Ave coelestis domina,
Cujus partus justitia
Est nostra liberatio,
Et in Deum protectio.

Esto mihi in Deum, etc.

Ave mater singularis,
Cujus haec est fecunditas,
Qua beatis viris,
Omnis remittitur iniquitas.

Idem ipse.

Ave stella virginalis,
Cujus partus singularis
De cythara nos docuit,
In cruce quando obiit.
Ipsi tunc bene psallimus
Decem chordis psalterii;
Ad ipsum cum referimus
Decalogum mysterii.

Confitemini Deo in cytharis, etc.

Ave mater, cujus partus
Cibus vitae nobis factus,
Gustare dedit mentibus

Quam suavis est Dominus.

Benedicam Dominum, etc.

Ave mater, cujus partus
Salus nobis est effectus;
Effusa datur framea,
Quae scidit nostra vulnera.

Effunde frameam, etc.

Ave mater, cujus partus
Torrens summae voluptatis
Verbum Patris homo factus,
Fons vitae est splendor lucis.

Inebriasti me, etc.

Ave coelestis janua,
Qua processit Emmanuel,
Cujus lumen justitia,
Judicium meridies.

Et educet quasi, etc.

Ave mater, quae gaudium
Peperisti fidelium,
Ante quem desiderium.
Manet se diligentium.

Per ipsam noster genitus
Patri non est absconditus,
Dum se facit advocatum,
Pium praebens exauditum.

Domine, ante te, etc.

Ave mater, de qua nostra
Processit expectatio.
In qua nostra substantia
Patris consedit solio.

Et nunc quae est, etc.

Ave mater, cujus partus
Se pro nobis holocaustum
Fecit Deus caro factus,
Solutum nostrum remedium.

Holocaustum improprium, etc.

Ave mater, cujus partus
Nostras sanavit animas,
Solus potens advocatus,
Agens causas, solvens culpas.

Ego dixi Domine, etc.

Ave mater castitatis,
Cujus laudes sonus fiunt epulantis,
Scripturarum cibi dulces,
In voce confessionis.

In voce exsultationis, etc.

Ave mater pietatis,
Cujus partus est altare Dei Patris.
Laetificans intuitus
Juventutis nostrae mentis.

Et introibo, etc.

Ave, quae Patris brachium
Peperisti Jesum Christum,

Cujus illuminatio,
Vultus Dei fit visio.

Sed dextera tua, etc.

Ave, cujus visceribus
Deus Pater ingenus
Eructavit verbum bonum,
Scilicet unigenitum.

Idem

Ave, cujus altissimus
Sacrauit tabernaculum,
Paternae lucis radius
Factus nobis remedium.

Fluminis, etc.

Ave mater, cujus partus
Nostra salus est effectus,
Unde clamat nobis Psalmus,
Plaudite gentes manibus

Idem.

Ave coelestis mansio,
De cujus templi medio
Suscepimus incarnatam
Dei misericordiam.

Suscepimus, etc.

Ave coeli introitus,
Divina habitatio,
Cujus est nobis filius
Et frater, et redemptio.

Frater non redemit, etc.

Ave Sion gloriosa,
De qua nobis manifesta
Fit carne Verbi facies
Decoris Dei specie.

A solis ortu, etc.

Ave coelestis janua,
Qua Dei Patris unica
Processit nobis reddita
Salutaris laetitia.

Redde mihi, etc.

PARS II PSALTERII B. MARIAE VIRGINIS.

Ave mater, cujus partus,
Ut oliva fructifera,
Patibulum crucis passus,
Totus fluxit in gratia.

Ego autem, etc.

Ave mater, cujus partus
305 Sine culpa fuit unus,
Qui nec traxit origine
Culpam natus ex Virgine.

Ave mater, cujus partus
Coelestis Patris unicus
Nobis voluntarium
Est factus sacrificium.

Voluntarie, etc.

Ave, ex qua Christus ortus
Vespere Pascha docuit,
Ad Pilatum mane ductus
Veritatem nuntiavit.

Meridie crucifixus
A Patre est exauditus;
Et moriens mortem vicit,
Qui de morte resurrexit.

Vespere et mane, etc.

Ave Regina virginum,
Laetitia fidelium,
Quae peperisti gaudium
In lumine viventium.

Quoniam eripuisti, etc.

Ave, cujus est filius
Super coelos exaltatus,
Et ipsius gloria

In omnia terrestria.

Exaltare super coelos, etc.

Ave, de qua natus
Utique est justus fructus,
Judicans eos in terra,
Ut exaltet ad aeterna.

Et dicet homo, etc.

Ave, cujus in arcanis
Incarnatum Verbum Patris,
Et cucurrit sine culpa,
Et direxit in gloria.

Neque iniquitas, etc.

Ave, de qua Patris Verbum
Causa nostri caro factum,
In Idumaeam gentium
Extendit calceamentum.

In Idumaeam, etc.

Ave mater, cujus solus
Deus et homo filius
A finibus terrae clamat,
Dum nos sibi membra sonat.

A finibus terrae, etc.

Ave mater, cujus partum
Semel est Deus locutus,
Dum Verbum Patris unicum
Tuus est vere filius.

Semel locutus est, etc.

Ave stella coelestium,
Pariens lucem gentium
Partum cujus adoramus,
Dum de luce vigilamus.

Idem.

Ave justorum gaudium,
In cujus sperant filium,
Et laudantur recti corde,
Ut laetentur in requie.

Laetabitur justus, etc.

Ave Sion illa pacis,
In qua decet hymnus Deum,
Aulam tuae castitatis
Qui sibi fecit thalamum.

Idem.

Ave, de cujus filio
Jubilamus Deo Patri,
Psalmos damus et laudamus,
Et in Psalmis jubilamus.

Idem.

Ave terra, quae dedisti
Fructum Deo confitendi,

Cujus est benedictio
Vera sui cognitio.

Ut cognoscamus, etc.

Ave templum Hierusalem,
Habens coelestem speciem,
A cujus sanctuario
Processit Patris visio.

Confirma hoc, Deus, etc.

Ave, per quam salva
Fit confitens Sion nostra
Et quibus datur gratia,
Inhabitabunt in ea.

Quoniam Deus salvam, etc.

Ave, per cujus filium
Deus in adjutorium
Pater festinans gentium,
Intendit ad adjuvandum.

Idem.

Ave secretum Virginis,
Quo processit lux luminis,
Et adjecit super omnem
Jesus Christus laudem.

Pater enim potestatis
Cunctas creans innotuit;
Pater vero dulcedinis
In Christo nobis claruit.

Ego autem semper sperabo, etc.

Ave vellus puritatis
In quo Deus majestatis
Inundans tanquam pluvia
Distillavit in gratia.

Descendet sicut, etc.

Ave, cujus est filius
Rectis corde bonus Deus,
Qui in eum convertitur,

Plenos dies consequitur.

Ideo convertetur, etc.

Ave terra virginea,
In cujus Deus medio
Salutis est mysteria
Operatus in Filio.

Deus autem Rex noster, etc.

Ave potens virtutibus,
Cujus in cruce Filius
Exsultans justi cornua
Peccati fregit vincula.

Et omnia cornua, etc.

Ave, cujus est Filius
Notus in Judaea Deus,
In Israel nomen ejus
Magnum recte credentibus.

Idem.

Ave mater, ex qua notam
Fecit Pater manum suam,
Et populos in brachio
Redemit unigenito.

Notam fecisti, etc.

Ave mater, de qua nobis
Angelorum natus panis
Nos revocat et reficit,
Et in seipso perficit.

Panem angelorum, etc.

Ave Regina gaudii,
Cujus coelestis filii
Christianus est populus,
Et oves pascuae ejus.

Nos autem populus, etc.

Ave, de qua Deus summus
In sinu Patris unicus,
Qui sedet super Cherubim
Apparet coram Effraim.

Qui sedet, etc.

Ave, ex qua Christus
Non est nobis recens Deus,
Qui Deo Patri Filius
Est aeterno coaeternus.

Audi populus, etc.

Ave cujus est filius
Deus Deorum Dominus,
Solus Deus dijudicans,
Et in se beatificans.

Idem.

Ave stella paradisi,
Mater illius filii

Qui solus est altissimus,
Et nomen ei Dominus.

Et cognoscant, etc.

Ave stella virginalis,
Cujus partus lator legis
Est in sinu Dei Patris,
Dator benedictionis.

Etenim benedictionem, etc.

Ave terra benedicta,
Sanctificans mysteria,
Cujus sacra fecunditas
Dei Patris est veritas.

Veritas, etc.

Ave mater, cujus partum
Omnes gentes verum Deum
Adorant et glorificant,
Confitentur, magnificent.

Inclino, etc.

Ave coelestis civitas,
Cujus Deus fecunditas.
Ave Sion, in qua natus
Est fundator ipse tuus.

Nunquid Sion, etc.

Ave mater veri Dei,
Qui pro nobis est mortuus,
Portas confregit inferi,
In mortuis liber solus.

Aestimatus sum, etc.

Ave coeleste lilium,
Per florem cujus unicum
Fidelibus est aeternum
Testamentum dispositum.

Disposui, etc.

Ave, cujus est filius
Refugium nobis factus,
Per carnis contubernium,
Quod est vitae remedium.

Idem.

Ave splendor singularis,
Cujus virtus virginalis
Fecit nobis altissimum
Deum Patrem refugium.

Dicit Domino, etc.

Ave bonum virginale,
Quod Domino confitemur,
Cum Virgine peperisse
Deum verum profitemur.

Idem.

Ave decor virginalis,
Quem Verbum Patris induit;

Cum de fonte castitatis
Nostra carne se praecinxit.

Idem.

Ave mater, cujus partus
Ultionum Rex Dominus,
Libertatem plene egit,
Cum de morte resurrexit.

Idem.

Ave mater puerpera,
Cujus regali filio
306 Jubilamus in gratias
Deo salutari nostro

Idem.

Ave, de cujus filio
Cantamus novum canticum,
Cujus carnis commercio
Salus est facta gentium.

Idem.

Ave mater gloriosa,
Lux solaris, clara stella,
De qua justus, lux, est orta,
Rectis corde laetitia.

Lux orta est, etc.

Ave mater, qua processit
Qui fecit mirabilia
Cujus sibi non salvavit
Sua virtute dextera.

Salvavit, etc

Ave Regis sacrarium,
Cujus honor judicium,
Pedum cujus est scabellum
Sumptae carnis indumentum.

Exaltare, etc.

Ave cujus fecunditas
Est divina suavitas,
Cujus misericordia
Est in aeterna saecula.

Laudate nomen ejus, etc.

Ave mater gratiarum,
Quae peperisti Dominum:
Ipsi misericordiam
Cantamus et judicium.

Idem.

PARS III.

Ave, per quam Sion nostra
Videbitur in gloria;
Cujus partus sunt opera
Omnis simul creatura.

Quoniam aedificavit Dominus, etc.

Ave, cujus sacrariis
Ille processit filius,
Cujus est admirabilis
Omni loco dominatus.

Benedicite Domino omnia opera ejus in om., etc.

Ave, de cujus intimis
Decorem Deus induit,
Et nostrae veste fidei
Ut lumine se vestivit.

Confessionem, etc.

Ave stella Paradisi,
Cujus lumen adoramus,
In laudes tui filii
Alleluya dum cantamus.

Titulus Psalmi, Alleluya.

Ave stella coelestium,
Alleluya fidelium,

Per quam Dei inter gentes
Nuntiantur omnes laudes.

Item Alleluya in titulo.

Ave mater, cui redempti
De manibus inimici,
Induti stola gemina
Duplex dicunt Alleluya

Duplex Alleluya in tit.

Ave mater, ex qua Deus
Deducitur incarnatus
In munitam civitatem,
Ecclesiae firmans fidem

Quia deducet, etc.

Ave de cujus filio
Laudes Pater non tacuit,
Ipsumque de sepulcro
A mortuis suscitavit.

Idem.

Ave David tu filia,
Ex qua nostra substantia
Sedet in Patris dextra,
Jesus Christus in gloria.

Idem.

Ave Regina virginum,
Quae peperisti filium,
Qui factus est redemptio
A Patre missa populo.

Redemptionem, etc.

Ave mater verae lucis,
Ex qua natus in tenebris
Lumen rectis corde Deus
Misericors est, et justus.

Exortum est, etc.

Ave mater, cujus partus
Super gentes est excelsus,
Respiciens humilia
Et in coelo et in terra.

Quis sicut Dominus, etc.

Ave mater, cujus partum
Non laudabunt in infernum;
Sed nos ipsi, qui vivimus,
Domino benedicimus.

Non mortui, etc.

Ave mater, cujus partus
Deo Patri fit acceptus
In vivorum regione,
Qua vivunt ejus morte.

Placebo, etc.

Ave mater, cujus partus
Salutari nos calice

Comparavit crucifixus,
Aqua simul et sanguine.

Calicem, etc.

Ave, per quam confirmata
Dei misericordia
Veritatem prophetiae
Aperuit et gratiae.

Quoniam confirmata, etc.

Ave mater, ex qua Deus
Illuxit Dei Filius,
Conceptus sancto Spiritu,
Et resurgens ex obitu.

Benedictus qui venit, etc.

Ave mater per quam via
Immaculata patuit,
Qui a Deo flore
Virginitas effloruit.

Idem.

Ave mater hujus partus,
Ad quem fide proclamamus,
Ut sit pius exauditor,
Ne valeat tribulator.

Idem.

Ave mater, qua processit
Jesus Christus Emmanuel,
Qui non dormit, sed custodit
Verus protector Israel.

Ecce non dormit, etc.

Ave mater hujus Regis,
Cujus sedes judicantis
Sedebunt in judicio,
Ad confitendum Domino.

Quia illic, etc.

Ave mater, cujus partus
Deus in coelis habitat,
In sanctorum dum mentibus
Dulcedine sua regnat.

Idem.

Ave, cujus in filium
Proclamat fides martyrum;
Nisi Deus adjuvisset,
Persecutor deglutisset.

Cum exsurgerent, etc.

Ave, cujus in filio
Qui confidunt ex animo,
Ut mons Sion fiunt Deo,
In quo pacis est visio.

Idem.

Ave, cujus in filio
Facti sumus consolati

Et replentur ex gaudio
Captivitate exuti.

Idem.

Ave coelestis Domina,
Cujus fructus merces sumus,
Ejus morte pretiosa
Quia vitam recepimus.

Cum dederit, etc.

Ave mater singularis,
Cujus partus Emmanuel,
Commercio suae carnis
Effectus est pax Israel.

Ut videas, etc.

Ave mater summi Regis,
Cujus est benedictio
Vitae semper aeternalis
Sempiterna possessio.

Et non dixerunt, etc.

Ave, cujus in filio
Haec est misericordia,
Ut fiat suo populo
Redemptio copiosa.

Quia apud Dominum, etc.

Ave, cujus in filium
Verus jam sperat Israel,
Qui non elatus moribus
De se sensit humiliter.

Speret Israel, etc.

Ave mater, Virgo pura,
Cujus partus homo Deus
Sedet in Patris dextera,
Deus David et filius.

Idem.

Ave, cujus in filii
Habitamus sic ovili,
Sicut illa germanitas,
Quam regit una charitas.

Idem.

Ave, cujus in filii
Inhabitamus atriis,
In ipsius quando fide
Dilatamur charitate.

Qui statis, etc.

Ave mater, in qua Deus
Est ex Sion benedictus,
Qui habitat Hierusalem,
Pacis habens visionem.

Benedictus Deus ex Sion, etc.

Ave, cujus in filio
Confitemur Patri Deo;

Quoniam fit in saecula
Ejus misericordia.

Idem.

Ave, terra benedicta,
In qua cantatur canticum,
Quod in terra aliena
Cantari non est licitum.

307 *Quomodo cantabimus, etc*

Ave, cujus filium
Dei Patris verum templum,
Prout decet, adoramus,
Dum credentes confitemur.

In conspectu, etc.

Ave, cujus partus
In tumulo soporatus
Sicut diem noctem fecit;
Cum de nocte surrexit.

Quia tenebrae, etc.

Ave, cujus est filii
Pater virtus salutaris,
Agentis in die belli
Vim nostrae redemptionis.

Domine, Domine virtus salutis meae.

Ave mater, cujus partus
Viam fecit singularis,
Donec peregit transitus,
Quibus vitam dedit nobis.

Cadent in retiaculo, etc.

Ave mater, cujus partum
Exspectabant omnes just;
Donec Pater genus nostrum
Retribuit ejus morti.

Educ de custodia, etc.

Ave mater hujus partus,
Cujus nos ducit spiritus
In terram rectitudinis,
Terram resurrectionis.

Spiritus tuus bonus, etc.

Ave mater, cujus partus,
Dum virtutes fulguravit,
Infideles principatus
Sua morte dissipavit.

Fulgura, etc.

Ave mater, cujus partus
Laudabilis est Dominus,
Et magnitudinis ejus
Non est finis nec terminus.

Magnus Dominus, etc.

Ave mater, cujus partus
Vere solvit compeditos;

Quia sola fides ejus
Illuminat mente caecos.

Dominus solvit, etc.

Ave mater, cujus partus
Aedificat Hierusalem;
Dum clementer nos ad ejus
Coadunat visionem.

Aedificans, etc.

Ave mater, cujus partum
Laudat illa Hierusalem,
Et suspirat in aeternum
Cujus fines dedit pacem.

Qui posuit fines, etc.

Ave mater, cujus parius
Ex debita justitia
Laudant cives angelorum,
Laudat omnis creatura.

Laudate eum omnes angeli, etc.

Ave, de cujus filio
Sion exsultant filiae;
Dum de ejus consortio
Sanctorum gaudent animae.

Exsultabunt sancti, etc.

Ave mater, cujus partum
In tympanis meritorum
Sancti laudant ex gratia,
Mortificantes vitia.

Laudate Dominum in tympano, etc.

CONCLUSIO SALUTATIONUM.

Ave gemma singularis,
Habens scripta mysteria
In aeterni Pontificis
Rationali posita.

Ave lamina aurea,
In te ipsa circumscripta,
Nomen propitiabile,
Quod est indicibile.

Ave sola virginitas,
Cujus Deus fecunditas,
Nostrum superhumera
Divina fit ex virtute.

Postea dicenda est antiphona:

Ave Regina coelorum, etc.

Post quam est haec altera.

Gaude Dei genitrix Virgo immaculata;
Gaude, quae gaudium ab Angelo suscepisti,
Gaude, quae genuisti aeterni luminis charitatem,
Gaude, mater pietatis et misericordiae;
Gaude, sancta Dei genitrix virgo;
Tu sola mater innupta;
Te laudat omnis factura
Genitricem lucis;
Sis pro nobis, quaesumus, pia interventrix.

Oratio: Deus qui de beatae, etc.

HYMNUS I IN LAUDEM S. DEIPARAE.

O Maria, nomen bonum,
Nomen memorabile:
O nomen quod melius est
Quam multae divitiae!

Balsamum aromatizans,
Thus mirae fragrantiae,
Flos aeternus, rasa senis,
Lignum semper viride.

Stella solis claritatem
Suo vincens jubare
Semper mater, quia nunquam
Eris sine sobole.

Speciosa, et suavis
Canticum laetitiae;
Praedicanda, et laudanda
Privatim et publice.

Non hic tantum, sed in tota
Mundi latitudine,
Et in coelis, angelorum
Dulci modulamine.

Quam amare nolle nullus
Potest sine crimine;
Cui placare, fide stare,
Et Deo est vivere.

Dum nos tibi commendamus,
Vota nostra suscipe
Dum te proni salutamus

Quamvis hoc rarissime

Ave tibi coram tua

Dicentem imagine,

Incorrupta et fecunda;

Noli me despicere.

Coelum coeli, domus Dei,

Vas misericordiae,

Pronum vero tibi constat,

Et omnino facile.

Ad quoscunque velis usus

Angelos transmittere

Quod exempla multa probant,

Quae longum est ponere.

Ideoque sanctum nobis

Gabrielem dirige,

Qui te matrem Dei sui

Salutavit congrue.

Atque sancto gravidandam

Praeconavit flamine,

Absque generatione

Naturalis copulae.

Ipsam ergo ad te nobis

Causidicum tribue,

Uti tibi preces nostras

Dignetur suggerere.

Coelestique corda nostra

Curet medicamine,

Quoniam sunt vanitati

Subdita superflue.

Sed tu, mater gloriosa,
Miseris compatere,
Tendens autem, si quis petit
Sua vincula solvere.

Nec dedignans miserorum
Aerumnas attendere:
Sed parata invocanti
Cuilibet succurrere.

O patrona peccatorum;
Huc ad nos convertere:
Illustrato terras nostras,
Vultus tui sidere.

Et ex illa sede tua
Domum istam respice,
Et commenda Salvatori
Locum hunc assidue.

Ac benigne nostri memor
Nos a malis eripe:
Beneficiisque tuis
Incessanter refove.

Qui nos tibi commendamus
Satis necessarie,
Implorantes opem tuam,
Super nos descendere:

Pro peccatis quippe nostris
Tribulamur undique,
Et praevaluerunt in nos
Hostium insidiae.

Qui nos dente genuino

Non cessant corrodere:
Heu miseri! cur sum natus
Tanta mala cernere.

Mater pia, stella maris,
In hoc consolare me,
Et amico Dei magno
Nicolao condole.

Et ancillae Dei piae
Cunegundi condole,
Cujus pene jam defecit
Honor Reipublicae,

Esto ejus interventu
Custos hujus vineae,
Et circumdans eam muro
Rapientes ab igne.

Palmites, quos produxi,
Benedic et protege:
Ipsa quippe te dilexit
Affectuosissime.

Semper ardens esse tuae
Commoda Ecclesiae.
Ergo et tu servos ejus
Consequenter dilige.

Consolare destitutos,
Lapsis manum porrige,
308 Et educ de luto fecis,
Et lacu miseriae.

Nec nos mortis sempiternae
Comprehendant tenebrae:

Sed illustret mentes nostras
Lux coelestis gratiae.

Dono cujus sordes tantas
Possumus evadere:
Quibus membra suos mundus
Polluit nefarie.

Tu es enim mater Christi,
Suavis memoriae,
Ob quam nobis sunt apertae
Paradisi januae.

Quae tam potens es in omni
Bonitatis opere,
Ut omnino sit beatum,
Qualis sis agnoscere.

Benedictum nomen ejus,
Sanctum et terribile.
Qui per orbem tuum nomen
Fecit esse celebre.

Per quam posset reis suis
Peccata remittere.
Semper quaeso, pia Virgo
Mei reminiscere.

Semperque veritatis
Dona mihi obtine,
Ut me suo tueatur
Sacro moderamine.

Sitque meae prece tua
Consolator animae,
Et infundat peccatrici

Oleum in lampade.

Quo parata possit sponso
Coelesti occurrere.

Ave Virgo singularis,
Sumens hoc benigniter,
Ave templum gratiarum
Omnium capabile:

Ave cujus peccatores
Pascunt eleemosynae.

Gaude felix, et ex ipsis
Unam mihi tribue,
Ut sublata per hanc omni
Hostium formidine,

Sine fine possim Deo
Gratias rependere.
Benedicant te per aevum
Virtutes angelicae.

Et ad laudem Creatoris
Te in omni tempore,
Omnes sancti benedicant
Et tu me, et ego te.

HYMNUS SECUNDUS IN DIVERSIS BEATAE DEI GENITRICIS CANTANDUS SOLEMNIIS.

Ave sponsa insponsata,
Per quam orbis prorsus lapsi
Facta est ereptio,

Ave per quam primae matris
Est Evae redemptio,
Sancta Maria, ora pro nobis.

Ave sponsa, etc.

Altitudo cogitandi
Tu inaccessibilis,
Invisibile profundum
Angelorum oculis.
Ξαῖρε κεχαριτομένη
Θοτόκος πάρθενε,
Sancta Dei genitrix, ora pro nobis.

Ave sponsa, etc.

Omnia portantem portans,
Solum imperii
Tu stella demonstrans solem,
Sol diei mystici;
Occidentis astrum mundi,
Luminis conspicui,
Sancta Virgo virginum, ora pro nobis.

Ave sponsa, etc.

Incarnationis divae
Uterus tu factus es.
Per quam renovatur omnis
Creaturae species,
Cum qua adoratur factor
Et origo omnium.
Angelorum Domina, ora pro nobis.

Ave sponsa, etc.

Tu exstans initiatrix
Arcani consilii
Mirandorum verae Christi
Operum primitiae,
Dogmatum illius exstans
Tu fons et initium,
Coelorum Regina, ora pro nobis.

Ave sponsa, etc.

Scala tu coelestis, per quam
Descendit ipse Deus,
Sponsa traducens terrena
Super coelestia.
Tu mater innupta omni

Honore superior,
Virgo perpetua, ora pro nobis.

Ave sponsa, etc.

Daemonum forte lamentum,
Moeror et tristitia;
Angelorum, sed bonorum
Laus, decus, et gloria.
Electorum tu cunctorum
Satians laetitia.
Templum Domini, ora pro nobis.

Ave sponsa, etc.

Generans perennem lucem
Et inaccessibilem;
Sophorum super ascendens
Omnium scientiam;
Animarum tu sanctarum
Splendor et prudentia.
Sacrarium Spiritus sancti, ora pro nobis.

Ave sponsa, etc.

Civicam vitae coronam
Fructu ventris germinans;
Possidens divinitatem,
Et in ea pullulans;
Nutricans humanitatem,
Et eam agricolans,
Tu sola sine exemplo, ora pro nobis.
*Virginitas illa, cui sunt sua salva sigilla,
Et fecunda tamen, det nobis dulce juvamen.*